



Comhairle an
Aontais Eorpaigh

An Bhruiséil, 27 Meitheamh 2023
(OR. en)

11107/23

Comhad Idirinstitiúideach:
2023/0214(NLE)

FISC 143
ECOFIN 654

TOGRA

ó:	Ardrúnaí an Choimisiúin Eorpaigh, arna s(h)íniú ag Martine DEPREZ, Stiúrthóir
dáta a fuarthas:	26 Meitheamh 2023
chuig:	Thérèse BLANCHET, Ardrúnaí Chomhairle an Aontais Eorpaigh
Uimh. an doic. ón gCoim.:	COM(2023) 342 final
Ábhar:	Togra le haghaidh CINNEADH CUR CHUN FEIDHME ÓN gCOMHAIRLE lena leasaítear Cinneadh Cur Chun Feidhme (AE) 2017/784 a mhéid a bhaineann le tréimhse údaráithe, agus le raon feidhme, an bhirt speisialta arna dhéanamh ag an Iodáil de mhaolú ar Airteagail 206 agus 226 de Threoir 2006/112/CE maidir leis an gcomhchóras cánach breisluacha

Gheobhaidh na toscaireachtaí i gceangal leis seo doiciméad COM(2023) 342 final.

Faoi iamh: COM(2023) 342 final



AN COIMISIÚN
EORPACH

An Bhruiséal, 26.6.2023
COM(2023) 342 final

2023/0214 (NLE)

Togra le haghaidh

CINNEADH CUR CHUN FEIDHME ÓN gCOMHAIRLE

lena leasaítear Cinneadh Cur Chun Feidhme (AE) 2017/784 a mhéid a bhaineann le tréimhse údaráithe, agus le raon feidhme, an bhirt speisialta arna dhéanamh ag an Iodáil de mhaolú ar Airteagail 206 agus 226 de Threoir 2006/112/CE maidir leis an gcomhchóras cánach breisluacha

MEABHRÁN MÍNIÚCHÁIN

De bhun Airteagal 395(1) de Threoir 2006/112/CE an 28 Samhain 2006 maidir leis an gcomhchóras cánach breisluacha¹ ('an Treoir maidir le CBL'), féadfaidh an Chomhairle, ag gníomhú di d'aon toil ar thogra ón gCoimisiún, údarú a thabhairt d'aon Bhallstát bearta speisialta a chur i bhfeidhm de mhaolú ar fhorálacha na Treorach sin, chun an nós imeachta um bailiú CBL a shimpliú nó chun cineálacha áirithe imghabhála nó seachanta cánach a chosc.

Le litir a cláraíodh leis an gCoimisiún an 26 Meán Fómhair 2022, d'iarr Poblacht na hIodáile údarú chun leanúint den mhaolú ar Airteagail 206 agus 226 den Treoir maidir le CBL maidir le ceanglais íoca agus sonrasctha CBL i ndáil le soláthairtí earraí agus seirbhísí d'údaráis phoiblí, do chuideachtaí arna rialú ag údaráis phoiblí lárnacha nó ag údaráis phoiblí áitiúla agus do liosta de chuideachtaí atá liostaithe ar stocmhalartán.

Le litir a cláraíodh leis an gCoimisiún an 8 Bealtaine 2023, d'iarr an Iodáil go ndéanfaí raon feidhme an bhirt speisialta a laghdú, ón 1 Iúil 2025 ar aghaidh, ionas nach gcumhdófaí leis ach soláthairtí earraí agus seirbhísí d'údaráis phoiblí agus do chuideachtaí áirithe atá faoi rialú údarás poiblí lárnach nó údarás poiblí áitiúil. I gcomhréir le hAirteagal 395(2) den Treoir maidir le CBL, chuir an Coimisiún na Ballstáit eile ar an eolas le litir dar dáta an 11 Bealtaine 2023 maidir leis an iarraidh a rinne Poblacht na hIodáile. Le litir dar dáta an 12 Bealtaine 2023, thug an Coimisiún fógra do Phoblacht na hIodáile go raibh an fhaisnéis uile ba gha aige chun an iarraidh a bhreithniú.

1. COMHTHÉACS AN TOGRA

• Forais agus cuspóirí an togra

Tar éis córas um sheiceálacha staidrimh a thabhairt isteach, d'aimsigh an Iodáil calaois CBL shuntasach i ndáil le soláthairtí earraí agus seirbhísí d'údaráis phoiblí. Chun deireadh a chur leis na cleachtais sin, d'iarr an Iodáil in 2014, i gcás soláthairtí d'údaráis phoiblí, nach n-íocfaí an CBL dlite leis an soláthróir a thuilleadh, ach go n-íocfaí é isteach i gcuntas baine leithleach, blocáilte de chuid na n-údarás cánach. 'Íocaíocht dheighilte' a thugtar go coiteann ar an sásra sin, arae an íocaíocht a d'aistreadh an custaiméir de ghnáth ina hiomláine chuig an soláthróir (comaoin mar mhalairt ar an soláthar, móide CBL), deighltear an íocaíocht sin ina dhá cuid, mar a leanas: (i) cuid amháin, an chomaoin, a íoctar le soláthróir na n-earraí nó na seirbhísí; agus, (ii) an chuid eile, an CBL dlite, a íoctar isteach i gcuntas baine blocáilte de chuid na n-údarás cánach.

Údaraíodh an maolú le Cinneadh Cur Chun Feidhme (AE) 2015/1401 ón gComhairle² go dtí an 31 Nollaig 2017. Leis an gCinneadh sin, údaraíodh don Iodáil gníomhú de mhaolú ar Airteagal 206 den Treoir maidir le CBL i dtaca le híoc CBL agus de mhaolú ar Airteagal 226 den Treoir maidir le CBL i dtaca leis na rialacha um shonrascadh.

D'iarr an Iodáil an maolú i leith tréimhse theoranta, rud a d'fhág go bhféadfadh sí bearta beartais rialaithe leormhaithe a eagrú agus a chur chun feidhme agus leas iomlán a bhaint as na sonraí a fhaightear trí ríomhshonrascadh. Trí oibleagáid ríomhshonrasctha a chur chun feidhme i gcás soláthairtí d'údaráis phoiblí, rud a d'fhágfadh go bhféadfaí rialú i bhfíor-am a dhéanamh ar idirbhearta aonair agus ar na méideanna beachta CBL arna ndlíodh le híoc ag údaráis phoiblí ar a gcuid ceannach, ba cheart go mbeadh an Iodáil in ann iniúchadh a

¹ IO L 347, 11.12.2006, lch. 1.

² IO L 217, 18.8.2015, lgh. 7-8.

dhéanamh ar an earnáil lena mbaineann ar bhonn gnáth-theicnící rialaithe gan gá a bheith le maolú ar an Treoir maidir le CBL chun an beart um íocaíocht dheighilte a chur i bhfeidhm.

De réir faisnéise a chuir an Iodáil isteach, trí ríomhshonrascadh a thabhairt isteach i gcás soláthairtí d'údaráis phoiblí, cuireadh cuid mhór faisnéise ar fáil do na húdaráis chánach maidir le sreabhadh na sonrasc, rud a d'fhág go bhféadfaí idirbhearta a rialú maille leis na méideanna CBL comhfhreagracha. Mar sin féin, níor tugadh isteach gné eile den chóras rialaithe éifeachtaigh — an oibleagáid tuairisc a thabhairt do na húdaráis chánach faoi shonraí gach sonraisc a eisíodh agus a fuarthas — go dtí an 1 Eanáir 2017. Theastaigh níos mó ama le go mbeadh an beart éifeachtach agus chun cáiniocóirí a spreagadh go héifeachtach chun feabhas a chur ar a gcomhlíontacht le hoibleagáidí cánach. Dá bhrí sin, d'iarr an Iodáil síneadh a chur leis an maolú ar Airteagail 206 agus 226 den Treoir maidir le CBL i dtaca le soláthairtí d'údaráis phoiblí.

Ina theannta sin, d'aimsigh an Iodáil imghabháil cánach in earnáil na soláthairtí do chuideachtaí atá faoi rialú na n-údarás poiblí agus do ghrúpa beag 40 cuideachta atá liostaithe ar an stocmhalartán. Chun an imghabháil cánach sin a chomhrac agus chun a áirithiú nach ndéanfar aon chaillteanas eile CBL i gcás ioncam poiblí, d'iarr an Iodáil raon feidhme an mhaolaithe ó Airteagail 206 agus 226 den Treoir maidir le CBL a leathnú amach go dtí soláthairtí earraí agus seirbhísí do na heintitis thuasluaite a mheas an Iodáil a bheith chomh hiontaofa le húdaráis phoiblí. Is iad na heintitis iad sin cuideachtaí atá faoi rialú údarás poiblí lárnach nó údarás poiblí áitiúil maille le liosta de thart ar 40 cuideachta atá liostaithe ar an stocmhalartán, nó 2 400 cuideachta, nó faoin tuairim sin, san iomlán. Bhí súil ag an Iodáil, dá leathnófaí an beart um íocaíocht dheighilte go dtí na cuideachtaí sin, go rachfaí i ngleic ar an gcaoi sin leis an imghabháil cánach a dhéantar trí sholáthróirí gan bheith ag íoc CBL leis na heintitis lena mbaineann agus, dá thoradh, go dtiocfadh méadú ar an ioncam CBL.

Le Cinneadh Cur Chun Feidhme (AE) 2017/784 ón gComhairle³, údaraíodh síneadh a chur leis an maolú gona raon feidhme leathnaithe, go dtí an 30 Meitheamh 2020. Le Cinneadh Cur Chun Feidhme (AE) 2020/1105 ón gComhairle⁴, cuireadh síneadh eile fós le tréimhse an mhaolaithe, go dtí an 30 Meitheamh 2023.

Tá an sásra um íocaíocht dheighilte ina chuid de phacáiste beart a thug an Iodáil isteach chun calaois chánach agus imghabháil cánach a chomhrac. Tá i gceist leis an bpacáiste beart seo, chomh maithe le nithe eile, ríomhshonrascadh agus tarchur leictreonach sonraí maidir le muirir laethúla. Tugadh an ríomhshonrascadh isteach an 1 Iúil 2018 i leith earnálacha áirithe, agus tá sé i bhfeidhm i bhfoirm ghinearálaithe ón 1 Eanáir 2019. Údaraíodh an oibleagáid le Cinneadh Cur Chun Feidhme (AE) 2018/593 ón gComhairle⁵. Chun go mbeadh sonraí maidir le muirir laethúla á dtarchur go leictreonach, ní mór do cháiniocóirí atá ag gabháil don trádáil mhiondíola agus do ghníomhaíochtaí comhchosúla (nach ngabhann oibleagáidí sonrastha leo) na sonraí maidir le muirir laethúla a stóráil go leictreonach agus iad a tharchur go leictreonach chuig *Agenzia delle Entrate*. Tháinig an oibleagáid dheireanach sin i bhfeidhm an 1 Eanáir 2020 agus, i gcás cáiniocóirí ag a bhfuil láimhdeachas os cionn EUR 400 000, an 1 Iúil 2019. An pacáiste beart sin, tá sé curtha in ionad bearta rialaithe eile, rud a chuireann ar a gcumas d'údaráis chánach na hIodáile na hoibríochtaí éagsúla arna ndearbhú ag na hoibreoirí a chros-seiceáil agus faireachán a dhéanamh ar a gcuid íocaíochtaí CBL. Tugadh isteach leis na hathruithe reachtacha is déanaí oibleagáid sonraí faoi idirbhearta CBL ó ríomhshonraisc, ó idirbhearta trasteorann agus ó ríomh-mhuirir a chur ar fáil láithreach do

³ IO L 118, 6.5.2017, lch. 17.

⁴ IO L 242, 28.7.2020, lch. 4.

⁵ Cinneadh Cur Chun Feidhme (AE) 2018/593 ón gComhairle an 16 Aibreán 2018 lena n-údaraítear do Phoblacht na hIodáile beart speisialta a thabhairt isteach de mhaolú ar Airteagail 218 agus 232 de Threoir 2006/112/CE maidir leis an gcomhchóras cánach breisluacha (IO L 99, 19.4.2018, lgh. 14-15).

cháiniocóirí chun é a dhéanamh níos simplí dóibh a gcomhlíontacht a chinntiú; rud a thug gur réamhchomhlíon *Agenzia delle Entrate* na tuairisceáin CBL agus gur ullmhaíodh measúnuithe CBL tráthrialta, a bhféadann an cáiniocóir glacadh leo nó forlíonadh a chur leo.

De réir aithris 7 de Chinneadh 2017/784, a luaithe a bheadh an córas sin curtha chun feidhme go hiomlán, níor cheart go mbeadh aon ghá le maolú breise ar Threoir 2006/112/CE chun an beart um íocaíocht dheighilte a chur i bhfeidhm. Mar a léirítear in aithris 8 de Chinneadh 2020/1105, áfach, bheadh sé róluath chun measúnú iomlán a dhéanamh ar a éifeachtacht na mbeart sin, ós rud é, an tráth sin, nár cuireadh chun feidhme iad go dtí tamall roimhe sin. Ina theannta sin, i bhfianaise na ndeacrachtaí a bhí ag an Iodáil mar gheall ar phaindéim COVID-19, bhí níos mó deacrachtaí ag daoine inchánach na hathruithe ba ghá a chur chun feidhme ina gcuid córas sonrascha, amhail a bhí ag na córais riaracháin cánach a gcuid córas rialaithe agus TF a oiriúnú. Dá bhrí sin, dá gcuirtí deireadh leis an mbeart d'fhéadfadh sé sin éifeachtaí diúltacha suntasacha a bheith aige sa chomhrac i gcoinne imghabháil cánach agus i mbailiú CBL, agus, ina theannta sin, maidir leis na costais riaracháin ar dhaoine inchánach. Ar an gcúis sin, cuireadh síneadh go dtí an 30 Meitheamh 2023 leis an údarú do leanúint de chur i bhfeidhm an tsásra um íocaíocht dheighilte.

Mar sin féin, breithníonn an Iodáil gur tháinig sineirgí chun cinn leis an sásra um íocaíocht dheighilte agus leis an ríomhshonrascadh éigeantach, sineirgí as ar tháinig laghdú suntasach ar an gcalaois CBL agus, dá bhrí sin, gur cheart an sásra a choinneáil ar bun, ós uirlis í an íocaíocht dheighilte a úsáidtear chun calaois a chosc, agus gurb é atá sa ríomhshonrascadh uirlis lena mbraitear calaois.

De réir na hIodáile, is é is bun le héifeachtacht an tsásra um íocaíocht dheighilte go ngníomhaíonn an ionstraim sin ar bhealach coiscitheach i ndáil le cásanna imghabhála cánach, rud a áirithíonn ioncam níos mó ná aon bheart a mbíonn gníomhaíocht rialaithe *ex post* i gceist leis. Is cuma cé chomh tráthúil, láithreach agus a bheadh an ghníomhaíocht rialaithe, ní féidir le bearta *ex-post* aisghabháil éifeachtach na cánach arna seachaint a áirithiú i gcónaí. Cé gur beart thar a bheith éifeachtach é an ríomhshonrascadh (nó tuairisciú sonraí sonraisc, sna cásanna sin nach bhfuil an ríomhshonrascadh éigeantach), d'fhéadfadh sé, nuair a bheadh an rialú déanta, nach mbeadh an acmhainn airgeadais riachtanach ag an imghabhálaí cánach chun an fiach a íoc. Ar an gcúis sin, maíonn an Iodáil gur uirlis an-éifeachtach é an sásra um íocaíocht dheighilte i gcásanna inarb airde céim comhlíontachta cánach an fhaighteora ná céim comhlíontachta cánach an tsoláthróra. Dá bhrí sin, breithníonn an Iodáil gur bearta comhlántacha iad na bearta sin, agus nach bearta iad atá so-chómalartaithe.

Mar sin féin, chun an gealltanais a thug sí go gcéimneodh sí amach an beart speisialta de réir a chéile a chomhlíonadh, rinne an Iodáil modhnú ar a hiarraidh, i litir a cláraíodh leis an gCoimisiún an 8 Bealtaine 2023, modhnú a d'fhágfadh go n-eisiafaí ó raon feidhme an bhirt speisialta, ón 1 Iúil 2025 ar aghaidh, soláthairtí earraí agus seirbhísí do chuideachtaí atá liostaithe in innéacs FTSE MIB an stocmhalartáin *Borsa Italiana*. Leis an tréimhse ama sin, daoine inchánach a ndéanann an srian ar raon feidhme an mhaolaithe difear dóibh, beidh siad in ann na coigeartuithe oibríochtúla iomchuí a dhéanamh, agus beidh údaráis chánach na hIodáile in ann faireachán a dhéanamh ar éifeachtacht an bhirt agus meastóireacht leormhaith a dhéanamh ar bhearta malartacha féideartha.

Tugtar faoi deara go bhfuil ar cheann d'éifeachtaí na híocaíochta deighilte nach féidir le soláthróirí, ós daoine inchánach iad, an CBL a íocadh ar a n-ionchur a fhritháireamh in aghaidh an CBL a fuarthas ar a soláthairtí. D'fhéadfadh sé go mbeidís de shíor i suíomh creidmheasa agus d'fhéadfadh sé go mbeadh orthu a iarraidh ar an gcóras riaracháin cánach an CBL sin a aisíoc leo iarbhrí. Os a choinne sin, faoi choinníollacha áirithe údaráíonn an

Iodáil do na soláthróirí sin an CBL nach bhfuair siad óna gcustaiméirí a fhritháireamh in aghaidh cánacha eile atá dlite san Iodáil, agus ar an gcaoi sin cuirtear teorainn leis an bhfadhb sreafa airgid b'fhéidir a bheadh, ina éagmais sin, ag gnólachtaí atá faoi dhliteanas a gcánacha a íoc san Iodáil. De réir na sonraí a chuir an Iodáil ar fáil, go ginearálta, in 2021 ba é 68 lá an mheántréimhse a theastaigh chun aisíocaíochtaí CBL a phróiseáil agus, in iarrataí a cuireadh ar aghaidh chuig daoine inchánach faoin íocaíocht dheighilte, ba é 63 lá an mheántréimhse.

I bhfianaise a bhfuil thuas, tá sé beartaithe glacadh leis an iarraidh ón Iodáil síneadh a chur le húdarú an mhaolaithe ach gan an síneadh sin a dhéanamh ach go dtí an 30 Meitheamh 2026 (seachas an 31 Nollaig 2026, mar a d'iarr an Iodáil). Ba cheart gur leor an tréimhse sin chun measúnú a dhéanamh ar éifeachtacht na mbeart arna gcur chun feidhme chun laghdú a dhéanamh ar an imghabháil cánach sna hearnálacha lena mbaineann. Thairis sin, beidh caoi níos fearr ar na gnólachtaí agus na córais riarachán cánach, faoin am sin, tabhairt faoi na hoiriúnuithe is gá a dhéanamh ar a gcuid córas.

I bhfianaise raon feidhme leathan an mhaolaithe, is tábhachtach a áirithiú go ndéanfar an obair leantach is gá laistigh de chreat an mhaolaithe seo agus, go háirithe, go ndéanfar measúnú ar thionchar an bhirt ar leibhéal na calaoise CBL agus ar chás na n-aisíocaíochtaí CBL do na daoine inchánach a chumhdaítear leis an maolú. Iarrtar ar an Iodáil, dá bhrí sin, tuarascáil a sholáthar faoin nós imeachta aisíocaíocht CBL maidir le staid na soláthróirí (daoine inchánach) a chumhdaítear leis an maolú, agus an tuarascáil sin a chur ar fáil 15 mhí tar éis teacht i bhfeidhm don mhaolú. Sa tuarascáil féin, ba cheart staidreamh a bheith inti a mhéid a bhaineann leis an meántréimhse is gá chun CBL a aisíoc iarbhrí leis na daoine inchánach sin agus ba cheart cur síos a dhéanamh inti ar fhadhbanna ar leith b'fhéidir a tháinig chun cinn sa chomhthéacs sin. Ba cheart a léiriú sa tuarascáil sin freisin cé na bearta éagsúla a cuireadh chun feidhme chun imghabháil cánach i gcás na soláthairtí a chumhdaítear leis an maolú a chomhrac, dáta a dteacht i bhfeidhm, chomh maith le meastóireacht ar a n-éifeachtacht.

• Comhsheasmhacht le forálacha beartais atá sa réimse beartais cheana

Tá an maolú comhsheasmhach leis na forálacha beartais atá sa réimse beartais cheana.

Ghlac an Coimisiún an 8 Nollaig 2022 Togra le haghaidh Treoir ón gComhairle lena leasaítear Treoir 2006/112/CE a mhéid a bhaineann le rialacha CBL don ré dhigiteach⁶. Tá ar cheann de phríomhchuspóirí an togra calaois CBL a chomhrac trí cheanglais maidir le tuairisciú digiteach a chur chun feidhme a bheidh bunaithe ar ríomhshonrascadh. Leis an athchóiriú sin, nuair a bheidh sé glactha, beidh na Ballstáit in ann an ríomhshonrascadh éigeantach a chur chun feidhme, mar atá an Iodáil a dhéanamh faoi láthair, ach beidh deireadh leis an ngá le tuilleadh maoluithe ar an Treoir maidir le CBL chun na córais sin a chur chun feidhme. Mar a luadh thuas, tá an tuairisciú sonraí chuig an córas riaracháin cánach trí ríomhshonrascadh leictreonach ina chuid den phacáiste beart a ghlac an Iodáil, mar aon leis an sásra um íocaíocht dheighilte, chun calaois CBL a chomhrac.

Le Cinneadh Cur Chun Feidhme (AE) 2019/310 ón gComhairle⁷, tugadh maolú comhchosúil don Pholainn chun an sásra um íocaíocht dheighilte a chur i bhfeidhm. Deonaíodh an maolú sin ar dtús go dtí an 28 Feabhra 2022 agus cuireadh síneadh leis níos déanaí go dtí an 28 Feabhra 2025⁸. Is éard atá i gcóras um íocaíocht dheighilte na Polainne sásra deonach um

⁶ COM/2022/701 final.

⁷ Cinneadh Cur Chun Feidhme (AE) 2019/310 ón gComhairle an 18 Feabhra 2019 lena n-údaráítear don Pholainn beart speisialta a thabhairt isteach de mhaolú ar Airteagal 226 de Threoir 2006/112/CE maidir leis an gcomhchóras cánach breisluacha (IO L 51, 22.2.2019, lch. 19).

⁸ Cinneadh Cur Chun Feidhme (AE) 2022/559 ón gComhairle an 5 Aibreán 2022 lena leasaítear Cinneadh Cur Chun Feidhme (AE) 2019/310 a mhéid a bhaineann leis an údarú arna dheonú don

íocaíocht dheighilte agus sásra éigeantach um íocaíocht dheighilte. An córas éigeantach sin um íocaíocht dheighilte, déanann sé difear do sholáthairtí earraí agus seirbhísí a n-íoctar astu le haistrithe bainc leictreonacha agus ar soláthairtí iad a dhéantar idir daoine inchánach i réimsí atá go mór ar neamhchosaint ar chalaíocht CBL agus a bhfuil stair fhada braite calaoise ag baint leo. I gcóras éigeantach um íocaíocht dheighilte na Polainne, feidhmíonn an banc mar ghníomhaire deighilte, agus aistríonn sé an méid arna íoc ag an gcustaiméir isteach i gcuntais ábhartha an tsoláthróra, i.e. an méid inchánach chuig gnáthchuntas an trádálaí agus an tsuim CBL chuig cuntas CBL blocáilte an trádálaí. Na cistí i gcuntas CBL blocáilte, is leis an duine inchánach iad, ach mar sin féin, tá an fhéidearthacht atá aige na cistí a dhiúscairt teoranta i bpriomsabal d'íocaíocht CBL atá dlite don údarás cánach nó d'íocaíocht CBL a eascraíonn ó shonraisc a fuarthas ó sholáthróirí.

2. BUNÚS DLÍ, COIMHDEACHT AGUS COMHRÉIREACHT

- **Bunús dlí**

Is é atá ina bhunús dlí Airteagal 395 den Treoir maidir le CBL lena bhforáiltear go bhféadfaidh an Chomhairle, ag gníomhú di d'aon toil ar thogra ón gCoimisiún, údarú a thabhairt d'aon Bhallstát bearta speisialta a thabhairt isteach de mhaolú ar fhorálacha na Treorach sin, chun an nós imeachta um bailiú CBL a shimpliú nó chun cineálacha áirithe imghabhála nó seachanta cánach a chosc.

- **Coimhdeacht (i gcás inniúlacht neamheisiach)**

I bhfianaise na forála den Treoir maidir le CBL ar a bhfuil sé bunaithe, tagann an togra faoi inniúlacht eisiach an Aontais Eorpaigh. Dá bhrí sin, níl feidhm ag priomsabal na coimhdeachta.

- **Comhréireacht**

Baineann an Cinneadh le húdarú arna dheonú do Bhallstát ar iarraidh uaidh féin agus níl aon oibleagáid ann.

Ós rud é go bhfuil an maolú teoranta ó thaobh ama de agus go bhfuil sé teoranta do sholáthairtí earraí agus seirbhísí don earnáil phoiblí, do chuideachtaí atá faoi rialú an stáit agus do chuideachtaí atá liostaithe ar an stocmhalartán (go dtí an 1 Iúil 2025 amháin, i gcás na cuideachtaí sin), tá an raon feidhme dírithe ar earnálacha sonracha a chruthaíonn fadhbanna móra maidir le himghabháil cánach. Dá bhrí sin, tá an beart speisialta i gcomhréir leis an aidhm atá á saothrú, i.e. imghabháil cánach a chomhrac.

- **An rogha ionstraime**

Cinneadh Cur Chun Feidhme ón gComhairle, sin í an ionstraim atá beartaithe.

Faoi Airteagal 395 den Treoir maidir le CBL, ní féidir maolú ar rialacha coiteanna CBL ach amháin i gcás ina n-údaróidh an Chomhairle é sin agus í ag gníomhú d'aon toil ar thogra ón gCoimisiún. Cinneadh Cur Chun Feidhme ón gComhairle, sin í an ionstraim is oiriúnaí ó tharla gur féidir í a dhíriú chuig Ballstát aonair.

Pholainn leanúint den bheart speisialta a chur i bhfeidhm de mhaolú ar Airteagal 226 de Threoir 2006/112/CE maidir leis an gcomhchóras cánach breisluacha (IO L 108, 7.4.2022, lch. 51).

3. TORTHAÍ AR MHEASTÓIREACHTAÍ EX POST, AR CHOMHAIRLIÚCHÁIN LEIS NA PÁIRTITHE LEASMHARA AGUS AR MHEASÚNUITHE TIONCHAIR

- **Comhairliúcháin leis na páirtithe leasmhara**

Ní dhearnadh aon chomhairliúchán leis na páirtithe leasmhara. Tá an togra seo bunaithe ar iarraidh a rinne an Iodáil agus is leis an mBallstát áirithe sin amháin a bhaineann sé.

- **Measúnú tionchair**

Ní dhearnadh measúnú tionchair toisc nach bhfuiltear ag súil go mbeidh tionchair shuntasacha eacnamaíocha, chomhshaoil nó shóisialta mar thoradh ar an togra.

Tá sé d'aidhm ag an togra le haghaidh Cinneadh Cur Chun Feidhme ón gComhairle síneadh a chur le cur i bhfeidhm an mhaolaithe ar Airteagail 206 agus 226 den Treoir maidir le CBL i gcás soláthairtí d'údaráis phoiblí, do chuideachtaí arna rialú ag údaráis lárnacha agus ag údaráis áitiúla agus do liosta de thart ar 40 cuideachta atá liostaithe ar an stocmhalartán. Trína fhorchur go n-íocfar an CBL dlite isteach i gcuntas bainc ar leith de chuid an chórais riaracháin cánach, tá sé d'aidhm ag an togra le haghaidh Cinneadh Cur Chun Feidhme ón gComhairle ar an gcéad dul síos imghabháil cánach, i bhfoirm neamhíoc CBL ag soláthróirí leis na heintitis liostaithe, a chomhrac. Ba chosúil gur uirlis éifeachtach chun na críche sin é an beart atá á chur i bhfeidhm ag an Iodáil faoi láthair.

De réir na sonraí a chuir an Iodáil ar fáil, is é atá i gceist le cur chun feidhme an bhirt méadú thart ar EUR 4,6 billiún in aghaidh na bliana ar íocaíochtaí. Chinn an *Agenzia delle Entrate* an méid sin, trína mheas, i gcás soláthróirí *Pubblica Amministrazione*, i gcás na n-idirbheart céanna, go bhfuil suim an CBL aschuir níos ísle a íocadh go hiarbhír tar éis sásra um íocaíocht dheighilte a thabhairt isteach, glan ón méadú ar chúiteamh agus aisíocaíochtaí, níos ísle ná na híocaíochtaí a rinne an *Pubblica Amministrazione* a bhaineann leis na hidirbhearta céanna. Baineadh de thátaí as tuilleadh anailíse a rinne an Iodáil gur fhan an éifeacht sin cobhsaí i gcaitheamh na mblianta ar fad a rabhthas ag cur an bhirt chun feidhme lena raon feidhme iomlán. Tá imní ar an Iodáil go bhféadfadh caillteanas ioncaim ar an méid céanna a bheith mar thoradh ar dheireadh a chur leis an mbeart tráth a mbeidh ar an Iodáil déileáil le bearna shuntasach CBL fós.

Éifeacht eile ba cheart a chur san áireamh ná nach bhfaigheann soláthróirí faoin gcóras seo an CBL óna gelaint. Dá bhrí sin, is minice a bheidh orthu aisíocaíocht éifeachtach CBL a iarraidh, i gcás nach féidir leo an CBL sin a fhritháireamh in aghaidh cánacha eile atá dlite san Iodáil. Chun tionchar diúltach ar na daoine inchánach sin a sheachaint, fiú mura bhfuil na soláthróirí bunaithe san Iodáil, tá sé ríthábhachtach go mbeidh an nós imeachta aisíocaíochta ag feidhmiú go cuí agus go tráthuile. De réir na hIodáile, comhlíonann na meántréimhsí próiseála le haghaidh aisíocaíochtaí an spriocdháta 3 mhí a bhunaítear leis an reachtaíocht náisiúnta den chuid is mó⁹. Ina theannta sin, giorraítear na tréimhsí próiseála sin i gcás cuideachtaí atá faoi réir an tsásra um íocaíocht dheighilte a bhuí leis an tosaíocht a thugtar do na hiarrataí sin. Thairis sin, trí ríomhshonrascadh a thabhairt isteach, éascaíodh próiseáil fhoriomlán na n-iarrataí, rud a chuidigh an laghdú ginearálta a dhéanamh ar an tréimhse is gá chun iarrataí ar aisíocaíocht a phróiseáil. De réir na sonraí a chuir an Iodáil ar fáil, in 2021 ba é 68 lá an mheántréimhse a theastaigh chun aisíocaíochtaí a phróiseáil agus, in iarrataí faoin íocaíocht dheighilte ba é 63 lá an mheántréimhse.

⁹ Airteagal 38-bis d'Fhorathne an Uachtaráin Uimh. 633 an 26 Deireadh Fómhair 1972.

- **Ceartha bunúsacha**

Níl aon iarmhairtí ag gabháil leis an togra maidir le cosaint na gceart bunúsach.

4. IMPLEACHTAÍ BUISÉADACHA

Ní bheidh aon drochthionchar ag an mbeart speisialta ar acmhainní dílse an Aontais a fhabhraíonn ó CBL.

Togra le haghaidh

CINNEADH CUR CHUN FEIDHME ÓN gCOMHAIRLE

lena leasaítear Cinneadh Cur Chun Feidhme (AE) 2017/784 a mhéid a bhaineann le tréimhse údaráithe, agus le raon feidhme, an bhirt speisialta arna dhéanamh ag an Iodáil de mhaolú ar Airteagail 206 agus 226 de Threoir 2006/112/CE maidir leis an gcomhchóras cánach breisluacha

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh,

Ag féachaint do Threoir 2006/112/CE ón gComhairle an 28 Samhain 2006 maidir leis an gcomhchóras cánach breisluacha¹, agus go háirithe d’Airteagal 395(1) di,

Ag féachaint don togra ón gCoimisiún Eorpach,

De bharr an mhéid seo a leanas:

- (1) Le Cinneadh Cur Chun Feidhme (AE) 2015/1401 ón gComhairle², údaráíodh don Iodáil go dtí an 31 Nollaig 2017 a cheangal go mbeadh cáin bhreisluacha (CBL) arna ndlíodh ar sholáthairtí d’údaráis phoiblí le híoc ag na húdaráis sin isteach i gcuntas bainc leithleach, blocáilte de chuid na n-údarás cánach (‘an beart speisialta’). Is éard a bhí sa bheart speisialta ná maolú ar Airteagail 206 agus 226 de Threoir 2006/112/CE i ndáil le rialacha um íoc agus sonrascadh CBL.
- (2) Le Cinneadh Cur Chun Feidhme (AE) 2017/784 ón gComhairle³, údaráíodh don Iodáil an beart speisialta a chur i bhfeidhm go dtí an 30 Meitheamh 2020, agus leathnaíodh a raon feidhme chun go gcuirfí san áireamh soláthairtí do chuideachtaí áirithe atá á rialú ag údaráis phoiblí agus do chuideachtaí atá liostaithe ar an stocmhalartán agus a áirítear in innéacs Milano Indice di Borsa, stocmhalartán de chuid Financial Times Stock Exchange (‘FTSE MIB’). Cuireadh síneadh leis an údarú sin ina dhiaidh sin go dtí an 30 Meitheamh 2023 le Cinneadh Cur Chun Feidhme (AE) 2020/1105 ón gComhairle⁴.
- (3) Le litir a cláraíodh leis an gCoimisiún an 26 Meán Fómhair 2022, d’iarr an Iodáil go gcuirfí síneadh leis an údarú sin go dtí an 31 Nollaig 2026. Le litir a cláraíodh leis an gCoimisiún an 8 Bealtaine 2023, d’iarr an Iodáil go ndéanfaí raon feidhme an bhirt speisialta a shrianadh, ón 1 Iúil 2025 ar aghaidh, do sholáthairtí earraí agus seirbhísí d’údaráis phoiblí agus do chuideachtaí áirithe arna rialú ag údaráis phoiblí.
- (4) Le litir dar dáta an 11 Bealtaine 2023, chuir an Coimisiún na Ballstáit eile ar an eolas faoin iarraidh a rinne an Iodáil. Le litir dar dáta an 12 Bealtaine 2023, thug an Coimisiún fógra don Iodáil go raibh an fhaisnéis uile ba ghá aige chun an iarraidh a mheá.

¹ IO L 347, 11.12.2006, lch. 1.

² IO L 217, 18.8.2015, lgh. 7-8.

³ IO L 118, 6.5.2017, lch. 17.

⁴ IO L 242, 28.7.2020, lch. 4.

- (5) Tá an beart speisialta mar chuid de phacáiste beart a thug an Iodáil isteach chun calaois chánach agus imghabháil cánach a chomhrac. An pacáiste beart sin, lena n-áirítear oibleagáid ríomhshonrasctha mar a údaraítear le Cinneadh Cur Chun Feidhme (AE) 2018/593 ón gComhairle⁵, tá sé curtha in ionad bearta rialaithe eile agus cuireann sé ar a gcumas d'údaráis chánach na hIodáile na hoibríochtaí éagsúla arna ndearbhú ag na hoibreoirí a chros-seiceáil agus faireachán a dhéanamh ar a gcuid íocaíochtaí CBL.
- (6) Breithníonn an Iodáil go ngiorraíonn an ríomhshonrascadh éigeantach, i gcomhthéacs an phacáiste beart a cuireadh chun feidhme, an t-am a theastaíonn ón córas riaracháin cánach chun teacht ar an eolas go bhfuil cás ann arbh fhéidir dó gur cás calaoise nó imghabhála cánach atá ann. Mar sin féin, breithníonn an Iodáil freisin, go mb'fhéidir gur dhodhéanta, in éagmais an tsásra um íocaíocht dheighilte a tugadh isteach leis an mbeart speisialta, aisghabháil a dhéanamh ó na calaoiseoirí cánach nó ó na himghabhálaithe cánach, ón uair a bheadh an chros-seiceáil déanta, dá mba rud é go mbeidís i ndócmhainneacht. Dá bhrí sin, de réir na taithí a fuarthas air tá an sásra um íocaíocht dheighilte, mar bheart *ex ante*, an-éifeachtach agus tá sé comhlántach leis an ríomhshonrascadh éigeantach, rud atá ina bheart *ex post*.
- (7) Thug an Iodáil gealltanais arís agus arís eile nach n-iarrfadh sí an beart speisialta lena gceadaítear an sásra um íocaíocht dheighilte a chur i bhfeidhm a athnuachan, ón uair a bheadh an pacáiste beart a bhí beartaithe ag an Iodáil a chur i bhfeidhm curtha chun feidhme go hiomlán. Mar sin féin, breithníonn an Iodáil, i bhfianaise éifeachtacht an bhirt speisialta agus na sineirgí atá aige le bearta eile a chuirtear i bhfeidhm, go háirithe an oibleagáid ríomhshonrasctha, gur cheart síneadh a chur leis an mbeart speisialta chun nach dtitfí ar gcúl sna hiarrachtaí a rinneadh chun bearna CBL na hIodáile a laghdú. Mar sin féin, chun an gealltanais a thug sí go gcéimneodh sí amach an beart speisialta de réir a chéile a chomhlíonadh, rinne an Iodáil modhnú ar a hiarraidh ionas go n-eisiafaí ó raon feidhme an bhirt speisialta, ón 1 Iúil 2025 ar aghaidh, soláthairtí earraí agus seirbhísí do chuideachtaí atá liostaithe ar an stocmhalartán agus a áirítear in innéacs stocmhalartán Milano Indice di Borsa, stocmhalartán de chuid Financial Times Stock Exchange ('FTSE MIB'). Leis an tréimhse sin, daoine inchánach a ndéanann an srian ar raon feidhme an bhirt speisialta difear dóibh, beidh siad in ann na coigeartuithe oibríochtúla iomchuí a dhéanamh, agus beidh údaráis chánach na hIodáile in ann faireachán a dhéanamh ar éifeachtacht an bhirt speisialta agus meastóireacht leormhaith a dhéanamh ar bhearta malartacha féideartha.
- (8) Tá ar cheann d'éifeachtaí an bhirt speisialta nach féidir le soláthróirí, ós daoine inchánach iad, an CBL a íocadh ar a n-ionchur a fhritháireamh in aghaidh an CBL a fuarthas ar a soláthairtí. D'fhéadfadh sé go mbeadh soláthróirí den sórt sin de shíor i suíomh creidmheasa agus d'fhéadfadh sé go mbeadh orthu a iarraidh ar an gcóras riaracháin cánach an CBL sin a íocadh ar a n-ionchur a aisíoc leo iarbhrí. De réir na faisnéise a thug an Iodáil, daoine inchánach a dhéanann idirbhearta atá faoi réir na scéime um íocaíocht dheighilte, tá siad i dteideal íocaíocht na gcreidmheasanna CBL ábhartha a fháil mar thosaíocht, laistigh de theorainn an chreidmheasa a eascraíonn as na hidirbhearta sin. Tugtar le tuiscint leis an gcleachtas sin go bpróiseáiltear de réir tosaíochta na hiarrataí ar aisíocaíocht a bhaineann leis an sásra um íocaíocht

⁵ Cinneadh Cur Chun Feidhme (AE) 2018/593 ón gComhairle an 16 Aibreán 2018 lena n-údaraítear do Phoblacht na hIodáile beart speisialta a thabhairt isteach de mhaolú ar Airteagail 218 agus 232 de Threoir 2006/112/CE maidir leis an gcomhchóras cánach breisluacha (IO L 99, 19.4.2018, lgh. 14-15).

dheighilte, agus go ndéantar amhlaidh ní hamháin le linn an réamh-imscrúdaithe ach freisin le linn íoc na suimeanna atá dlite ó aisíocaíochtaí neamhthosaíochta.

- (9) Ba cheart teorainn ama a chur leis an maolú a iarradh, chun measúnú a dhéanamh an bhfuil an beart speisialta iomchuí agus éifeachtach. Ba cheart, dá bhrí sin, síneadh a chur leis an údarú go dtí an 30 Meitheamh 2026, rud a d'fhágfadh go leor ama chun measúnú a dhéanamh ar éifeachtacht na mbearta arna gcur chun feidhme ag an Iodáil arbh aidhm dóibh laghdú a dhéanamh ar an imghabháil cánach sna hearnálacha lena mbaineann.
- (10) Chun a ráthú go ndéanfar an obair leantach is gá faoi chuimsiú an mhaolaithe a iarradh agus go háirithe chun measúnú a dhéanamh ar an tionchar ar aisíocaíochtaí CBL le daoine inchánach a chumhdaítear leis an maolú sin, ba cheart a chur de cheangal ar an Iodáil tuarascáil a chur faoi bhráid an Choimisiúin faoi mhí Mheán Fómhair 2024 maidir leis an staid fhoriomlán ó thaobh aisíocaíochtaí CBL le daoine inchánach, agus go háirithe maidir leis an meántréimhse is gá chun na haisíocaíochtaí sin a phróiseáil, agus maidir le héifeachtacht an bhirt speisialta agus aon bheart eile arna gcur chun feidhme ag an Iodáil arbh aidhm dóibh laghdú a dhéanamh ar an imghabháil cánach sna hearnálacha lena mbaineann. Ba cheart liosta de na bearta éagsúla a cuireadh chun feidhme, mar aon lena ndáta teacht i bhfeidhm, a bheith sa tuarascáil sin.
- (11) Tá an beart speisialta comhréireach leis na cuspóirí atá á saothrú, ós rud é go bhfuil sé teoranta ó thaobh ama de agus go bhfuil sé teorannaithe d'earnálacha ina bhfuil fadhbanna suntasacha a mhéid a bhaineann le himghabháil cánach. Ina theannta sin, leis an mbeart speisialta ní chruthaítear riosca go n-aistreofaí an imghabháil cánach go dtí earnálacha eile nó go dtí Ballstáit eile.
- (12) Ní bheidh tionchar diúltach ag an mbeart speisialta ar mhéid foriomlán an ioncain cánach a bailíodh ag céim an tomhaltais deiridh agus ní bheidh aon drochthionchar aige ar acmhainní dílse an Aontais a fhabhraíonn ó CBL.
- (13) Dá bhrí sin, ba cheart Cinneadh Cur Chun Feidhme (AE) 2017/784 a leasú dá réir,
TAR ÉIS AN CINNEADH SEO A GHLACADH:

Airteagal 1

Leasaítear Cinneadh Cur Chun Feidhme (AE) 2017/784 ón gComhairle mar a leanas:

- (1) in Airteagal 1, scriostar an tríú fleasc;
- (2) in Airteagal 3, an dara fomhír, cuirtear an dáta '30 Meán Fómhair 2024' in ionad an dáta '30 Meán Fómhair 2021';
- (3) in Airteagal 5, cuirtear an dáta '30 Meitheamh 2026' in ionad an dáta '30 Meitheamh 2023'.

Airteagal 2

Gabhfaidh éifeacht leis an gCinneadh seo an lá a thabharfar fógra faoi.

Beidh feidhm ag Airteagal 1, pointe (1), ón 1 Iúil 2025, áfach.

Airteagal 3

Is chuig Poblacht na hIodáile a dhírítear an Cinneadh seo.

Arna dhéanamh sa Bhruiséil,

Thar ceann na Comhairle

An tUachtarán